



## COMUNICAT STAMPA

### 27 de juni: giarida dla mostra di pësc y saurs dl Triassich dala Cina tl Museum Gherdëina

Per l prim iede vëniel metù ora tl uzidënt fossii de valuta straudinèra dala Cina dl Sud – N liam geologich strënt cun la Dolomites

*Co cialova pa ora la vita tl mer dan 240 millions de ani? Co pudons'a nës se nmaginé i pësc y rettii dl Triassich? La respostes nes vën dates dai reperc de pësc y vertebrei marins unic a lum pra la giavedes tla Cina dl Sud y che vën mustrei per l prim iede ora dai cunfins cinëisc. L Museum Gherdëina presentea chësta espusizion a Urtijëi tl foyer dla Cësa di Ladins. La mostra vën inaugureda n lunesc ai 27 de juni, dala 20.30, i jurnalisc à ucajion de na a preview bele domesdi.*

L nen ie nia mé per cajo che i vertebrei marins giapèi su tla Cina dl Sud vën presentei iusta a Urtijëi: l Museum Gherdëina cunservea te si culezion paleontologica deplu curëc y fossii de marueia scuvierc ti ultims 60 ani tl raion de Gherdëina, dantaldut tla vëtes de Secëda. De nteres mundiel ie i restc dl schilet dl gran itiosaur che pudova arjonjer en vita i 10 metri de lunghëza. Chisc òsc giapèi sun Secëda daujin dala sciorta de Pana, à judà pro a fé ntënder mic l'evoluzion de chisc saurs marins che al scumenciamënt ti semiova deplu a na gran lingiola che no a n pësc.

Danter i fossii giapèi su te Gherdëina y chëi unic a lum tla Cina iel na parentela strënta ajache dan 240 millions de ani, la Dolomites y la Cina ova si spuendes sul medemo mer primordiel dla Tethys. La mostra speziela "Pësc y saurs dl Triassich dala Cina dl Sud" porta adum doi tradizion de nrescida sun i fossii dla Dolomites y chëi cinëisc. La mostra permanenta y i passa 30 reperc de majera atrazion unic a lum tla Cina pieta sën na sëuravijion dla formes de vita tl mer primordiel dl Triassich y mpermët na udleda de marueia ai antenac di abitanc dl mer de nosc tëm.

L segundo motif che à purtà chësta espusizion a Urtijëi ie la culaburazion strënta che l Museum Gherdëina porta inant da cinch ani cun l professëur Andrea Tintori, paleontologh dla Università degli Studi de Milan. Èl à studià do avisa i fossii di plu vedli pësc dla Dolomites, ma nia mé: l Prof. Tintori ie nce stat un di respunsabli dla giavedes tla Cina dl Sud.

La mostra speziela sun i vertebrei marins dl Triassich vën inaugureda n lunesc ai 27 de juni, da mesa la 9 da sëira, cun la persënza de ghesc d'unëur y na relazion dl professëur Tintori.

La mostra ie da udëi dal 28 de juni inant nchin ai 27 de lugio 2016, l'entreda ie debant.

**Ala redazions** nteressedes a na vijita danora ti vëniel pità na **preview n lunesc domesdi**, cun l curadëur dla mostra Prof. Tintori y la diretëura dl Museum Gherdëina, Dr. Paulina Moroder.

Per fé ora n'ancunteda ie la diretëura da arjonjer al telefon (0471 797554 o 338 6040477) o nce tres mail (p.moroder@museumgherdeina.it)

Per outra nfurmazions:

Paulina Moroder

E-mail: p.moroder@museumgherdeina.it

Tel.: 0471 797554 - Cell.: 338 6040477